

稼軒長短句

二

稼軒長短句卷之四

滿江紅

建康史帥致道席上賦

鵬翼垂空笑人世蒼然無物又還向九重
深處玉階山立袖裏珍奇光五色他年要
補天西北且歸來談笑護長江波澄碧
佳麗地文章伯金縷唱紅牙拍看尊前飛
下日邊消息料想寶香黃閣夢依然畫舫
清溪笛待如今端的約鍾山長相識

中秋寄遠

快上西樓怕天放浮雲遮月但喚取玉纖
橫管一聲吹裂誰做冰壺涼世界最憐玉
斧修時節問嫦娥孤令有愁無應華髮
雲液滿瓊盃滑長袖舞清歌咽歎十常八
九欲磨還缺但願長圓如此夜人情未必
看承別把從前離恨總成歡歸時說

中秋

美景良辰算只是可人風月況素節揚輝

長是十分清徹着意登樓瞻玉兔何人張
幕遮銀闕倩蜚廉得得為吹開憑誰說
弦與望從圓缺今與昨何區別羨夜來手
把桂花堪折安得便登天柱上從容陪伴
酬佳節更如今不聽塵談清愁如髮

又

點火櫻桃照一架荼蘼如雪春正好見龍
孫穿破紫苔蒼壁乳燕引雛飛力弱流鶯
喚友嬌聲怯問春歸不肯帶愁歸腸千結

層樓望春山疊家何在煙波隔把古今
遺恨向他誰說蝴蝶不傳千里夢子規叫
斷三更月聽聲聲枕上勸人歸歸難得

暮春

可恨東君把春去春來無迹便過眼等閒
輸了三分之一晝永暖翻紅杏雨風晴扶
起垂楊力更天涯芳草最關情烘殘日
湘浦岸南塘驛恨不盡愁如織算年年辜
負對他寒食便恁歸來能幾許風流早已

非疇昔凭畫欄一線數飛鴻沉空碧

又

家住江南又過了清明寒食花徑裏一番
風雨一番狼籍紅粉暗隨流水去園林漸
覺清陰密算年年落盡刺桐花寒無力
庭院靜空相憶無說處閒愁極怕流鶯乳
燕得知消息尺素如今何處也綵雲依舊
無蹤迹謾教人羞去上層樓平蕪碧

贛州席上呈太守陳季陵侍郎

落日蒼茫風纔定片帆無力還記得眉來
眼去水光山色倦客不知身遠近佳人已
卜歸消息便歸來只是賦行雲襄王客
些箇事如何得知有恨休重憶但楚天特
地暮雲凝碧過眼不如人意事十常八九
今頭白笑江州司馬太多情青衫濕

賀王帥宣子平湖南寇

笳鼓歸來舉鞭問何如諸葛人道是匆匆
五月渡瀘深入白羽風生貔虎譟青溪路

斷鼉鼉泣早紅塵一騎落平岡捷書急
三萬卷龍頭客渾未得文章力把詩書馬
上笑驅鋒鏑金印明年如斗大貂蟬却自
兜鍪出待刻公勲業到雲霄浯溪石

又

漢水東流都洗盡髭胡膏血人盡說君家
飛將舊時英烈破敵金城雷過耳談兵玉
帳冰生頰想王郎結髮賦從戎傳遺業

腰間劍聊彈鋏尊中酒堪為別況故人新

擁漢壇旌節馬革裹屍當自誓蛾眉伐性
休重說但從今記取楚樓風裴臺月

江行簡楊濟翁周顯先

過眼溪山怪都似舊時曾識還記得夢中
行遍江南江北佳處徑須携杖去能消幾
緬平生屐笑塵勞三十九年非長為客
吳楚地東南坼英雄事曹劉敵被西風吹
盡了無塵迹樓觀纔成人已去旌旗未卷
頭先白歎人間哀樂轉相尋今猶昔

又

敲碎離愁紗窗外風搖翠竹人去後吹簫
聲斷倚樓人獨滿眼不堪三月暮舉頭已
覺千山綠但試把一紙寄來書從頭讀

相思字空盈幅相思意何時足滴羅襟點
點淚珠盈掬芳草不迷行客路垂楊只礙
離人目最苦是立盡月黃昏欄干曲

又

倦客新豐貂裘敝征塵滿目彈短鋏青蛇

三尺浩歌誰續不念英雄江左老用之可
以尊中國歎詩書萬卷致君人翻沉陸
休感慨澆醺醪人易老歡難足有玉人憐
我為簪黃菊且置請纓封萬戶竟須賣劍
酬黃犢甚當年寂寞賈長沙傷時哭

又

風捲庭梧黃葉墜新涼如洗一笑折秋英
同賞弄香按藥天遠難窮休久望樓高欲
下還重倚拚一襟寂寞淚彈秋無人會

今古恨沉荒壘悲歡事隨流水想登樓青
鬢未堪憔悴極目煙橫山數點孤舟月淡
人千里對嬋娟從此話離愁金尊裏

冷泉亭

直節堂堂看夾道冠纓拱立漸翠谷羣仙
東下佩環聲急誰信天峰飛墮地傍湖千
丈開青壁是當年玉斧削方壺無人識
山木潤琅玕濕秋露下瓊珠滴向危亭橫
跨玉淵澄碧醉舞且搖鸞鳳影浩歌莫遣

魚龍泣恨此中風物本吾家今為客

再用前韻

照影溪梅悵絕代佳人獨立便小駐雍容
千騎羽觴飛急琴裏新聲風響佩筆端醉
墨鴉棲壁是史君文度舊知名今方識
高欲卧雲還濕清可漱泉長滴快晚風吹
帽滿懷空碧寶馬嘶歸紅旆動龍團試水
銅瓶泣怕他年重到路應迷桃源客

席間和洪景廬舍人兼司馬漢

章大監

天與文章看萬斛龍文筆力聞道是一詩
曾換千金顏色欲說又休新意思強啼偷
笑真消息算人人合與共乘鸞鑾坡客

傾國艷難再得還可恨還堪憶看書尋舊
錦衫裁新碧鶯蝶一春花裏活可堪風雨
飄紅白問誰家却有燕歸梁香泥濕

送湯朝美司諫自便歸金壇

瘴雨蠻煙十年夢尊前休說春正好故園

桃李待君花發兒女燈前和淚拜雞豚社
裏歸時節看依然舌在齒牙牢心如鐵
活國手封侯骨騰汗漫排閭闔待十分做
了詩書勲業當日念君歸去好而今却恨
中年別笑江頭明月更多情今宵缺

送李正之提刑入蜀

蜀道登天一盃送繡衣行客還自歎中年
多病不堪離別東北看驚諸葛表西南更
草相如檄把功名收拾付君侯如椽筆

兒女淚君休滴荆楚路吾能說要新詩準
備廬山山色赤壁磯頭千古浪銅鞮陌上
三更月正梅花萬里雪深時須相憶

送信守鄭舜舉被召

湖海平生算不負蒼髯如戟聞道是君王
着意太平長策此老自當兵十萬長安正
在天西北便鳳凰飛詔下天來催歸急
車馬路兒童泣風雨暗旌旗濕看野梅官
柳東風消息莫向蘆菴追語笑只今松竹

無顏色問人間誰管別離愁盃中物

和楊民瞻送祐之弟還侍浮梁

塵土西風便無限淒涼行色還記取明朝
應恨今宵輕別珠淚爭垂華燭暗雁行欲
斷哀箏切看扁舟幸自澀清溪休催發
白石路長亭側千樹柳千絲結怕行人西
去棹歌聲闋黃卷莫教詩酒污玉階不信
仙凡隔但從今伴我又隨君佳哉月

遊南巖和范先之韻